

Liklik nius long

prea, fivim na fo

EBC Wok Misin

Niusleta No. 39 - Oktoba 2011

Dia ol pren bilong wok misin!

Mipela i amamas long salim dispela niusleta No. 39 long yupela ol kongrigesen. Yupela ol misin diken i ken makim sampela bratasusa long ritim ol ripot long taim bilong lotu long Sande 30 Oktoba 2011. Ofa long dispela Sande i go long sapotim wok misin. Tenkyu tru long prea bilong yupela ol bratasusa i harim ol dispela ripot.

Adres bilong salim mani:
EBC Overseas Mission
BSP Goroka Branch
No. 1000 751 861

Ol Fild Adres:

Mike Kaire
EBC Community Service
P.O. Box 250, Dili East Timor
Mobile: (05) 670 7757402
Email: mmkaire@yahoo.com
www.carechannels.org

David Bani na Kawanda Kaman
Logos Hope
Alte Neckarelzer Str. 2,
74821 Mosbach, GERMANY
Email: david.bani@gbaships.org
Email: kawanda.kaman@gbaships.org
Samuel Mauwe
Email: samuel.mauwe@gmail.com
Mobile: + 260 973063701

*Liklik nius long EBC Wok Misin
Design & Printing by:
EBC Publications Department, Lae*

Liklik nius long

EBC Wok Misin

Tasol em i tokim mi olsem, "Marimari bilong mi em inap long yu. Long wanem, strong bilong mi i save kamap strong tru long man i nogat strong." Bikpela i tok olsem, olsem nau mi save amamas moa yet long stap olsem manmeri i no gat strong. Olsem bai strong bilong Kraisi i ken i stap long mi. Olsem na sapos long dispela wok bilong Kraisi mi no gat strong na ol man i mekim nogut long mi, na ol kain kain hevi na trabel i kisim mi, na ol man i wok long bagarapim mi, orait bel bilong mi i save stap gutpela tasol. Long wanem, taim mi no gat strong, long dispela taim tasol mi gat strong tru. (2 Korin 12.9,10)

Mipela famili Kar i salim planti gritings na tok bikpela tenkyu tru long prea na sapot bilong yupela long wok bilong Bikpela long hia. Hia em sampela ripot long wok misin insait long Vanimo na long boda.

LIKLIK KONGRIGESAN LONG TAUN LOTU

Ol liklik lain bratasusa i save kam gut na mipela i save lotu. Sampela taim i go pinis mipela i bin lotu aninit long haus sel tasol nau God i helpim na mipela i sindaun insait long wanpela liklik kapa haus. Wanwan taim ol arapela bratasusa i save kam lotu wantaim mipela.

TRINDE SKUL LONG PLES WARAKONGKONG (SETTLEMENT)

Mipela i save bungim ol pikinini long olgeta Trinde na autim Baibel stori, tasol ol papamama nogat. Mipela i save wari long ol dispela pikinini na skulim ol long Tok



Sandeskul pikinini na ol bratasusa long Vanimo.

bilong God. Ples i longwe liklik tasol ol pikinini i save amamas tru long kam na mipela i save lotu wantaim ol. Susa Margaret, Getrut na Barbara i save helpim gut tru long dispela wok.

TEE LONG HAUS KALABUS – VANIMO CIS

Mipela tenkyu long God i blesim dispela wok misin. Tupela taim greduesen i kamap pinis na planti i kisim blesing long TEE na dispela i senisim planti laip. Dispela kalabus em i bilong 4-pela distrik long Vanimo. Nelson bilong Aitape i kisim bikpela helpim tru na em i laik bringim gutnius i go long ples bilong en. Tingim em long prea. Sande lotu i bin kamap insait long banis, tasol nogat sapot na mipela i larim i stap. Tingim long prea tu.

AUTRIS WOK

Wok autris i go on yet long Vanimo taun we ol planti trekt i save i go long ol manmeri na sampela bilong longwe lain olsem long Green River (em ples bilong brata Yasinga) i save kam long haus na kisim i go.

Sampela taim God i opim dua tu long autim Tok bilong en long redio NBC Sandaun.

WOK RI LONG SKUL

God i helpim na long Amino Praimeri Skul i gat RI wantaim

planti pikinini. Nogat RI tisa i save soim amamas long mekim dispela wok, olsem na mi save bungim olgeta pikinini bilong ol arapela sios tu.

WOK VISIT

Wanpela gel bilong brata Kaikuru long ples Pasi long Hagen i tanim bel. Man bilong susa i no bihainim Jisas yet. Tingting i stap long mipela i ken holim wanpela Sandeskul na lotu wantaim, long wanem, ples em i longwe tru long ol i ken kam bung wantaim mipela na tu i no gat bas i ron long Sande. Wok i kamap tasol i gat nid yet long wokman.

Planti pikinini i save kam bung long mekim lotu we mipela i save holim namel long wik.

GRAUN NA HAUS

Tenkyu long God i harim prea bilong yumi na i helpim na nau mipela i gat graun na ol kamda i wok long nupela haus. Planti samting mipela i bin ting i hat, nau God i wok long helpim na ol samting i kamap gut. God tasol em inap mekim taim yumi bilip na prea. Em yet i kisim biknem na ona. (Luk 1.37)



Givim han long sanapim haus wantaim ol kamda.

FAMILI

Mipela i litimapim nem bilong God long lukautim na blesing bilong en long wan wan de. Mipela oltaim i no save lus tingting long prea na sapot bilong yupela wan wan dia bratasusa na ol pikinini. Mipela i save bungim birua tasol God i save i stap strongpela banis bilong mipela. Efesus 6.12 i save strongim mipela olsem mipela i no pait long

ol manmeri, nogat. Yumi pait long ol strongpela spirit na ol gavman na ol kain kain samting i gat strong, ol i save bosim graun long dispela taim tude. Planti taim kain kain tingting i laik raunim mipela tasol oltaim bel isi na strong bilong God i save strongim mipela gen long sanap yet na i no ranawe.

WOK NAMEL LONG REFUJI KEM

Ol refuji i ranawe long gavman bilong Indonesia long kisim fridom long Wes Papua. Long stat bilong wok misin, God i bin opim dua long bungim ol dispela lain na stat long wok wantaim ol. Ol i stap ausait long Vanimo taun we kain kain sik i save bungim ol. Ol i no save kam long haus sik, long wanem, ol i no save long tok Pisin na ol i save painim bagarap. Mipela famili i save bringim marasin long ol na kisim sampela i kam long haus sik long lukim dokta. Ol Wamena lain i luk olsem ol hailens bilong yumi stret. Ol i save amamas tru long lukim mitupela susa i helpim



Wantaim ol lain long Wes Papua.

ol na ol i kamap olsem papamama bilong mipela na lukautim mipela long gaden kaikai sampela taim. Ol i save stap olsem wanpela strongpela kongrigesen we mipela i save kisim sapot long ol.

HEVI BILONG FRIDOM LONG WES PAPUA

Wanpela samting olsem pen tru ol bratasusa bilong yumi i wok long kisim, em kain kain bagarap long han bilong Indonesia gavman long fridom ol i nidim. Tingim. God i mekim gut long yumi, tasol ol i kapsaitim planti blut na wok long i dai yet. Planti ol i lusim kantri bilong ol na i go olsem refuji long Vanimo na Kiunga na ol arapela senta long PNG, na sampela i stap yet na wok long kisim kain kain hevi.

Sampela poin long tenkyu:

- Tenkyu long strong na blesing bilong God.
- Tenkyu long graun na haus i stap pinis.
- Tenkyu long dua i op long boda.

Prea:

- Prea long God i ken blesim ol kamda i wokim haus.
- Prea long God i ken salim sampela wokmanmeri i kam.
- Prea God i ken strongim mipela long go on.

God i ken blesim yupela wanwan.

Steven, Margrit na ol pikinini

David Bani i kam bek long PNG

Long 19 Septemba 2011 David Bani i bin lusim OM Sip Logos Hope na i kam bek long PNG. Pastaim em i bin gat wanpela OM kos long Port Moresby na bihain em i go bek long ples bilong en long Kainantu. Em i bin stap tupela krismas wantaim ol lain long Logos Hope na ol i mekim wok misin wantaim. Mipela i laik tingim em na famili bilong en long prea. Tu mipela i laik tok, "Welkam bek long PNG."